



Grupa Bal populer
SĒLVA - S. CRISTINA

Na lia de inuvazion y tradizion

*La Grupa da Bal Sëlva-S. Cristina se njinia ca per la "Tlekanocht".
La ie na grupa scialdi ativa y l ie da auzé ora da una pert si mpèni per la
cultura y la tradizions ma nce si spirt inuvatif*

Lies - Na cossa nueva per Gherdëina ie stata canche la doi grupes de bal populer dla valeda à balà deberieda n ucajion dla festa di 20 ani Nëus Jëuni Gherdëina ai 30 de setëmber a Urtijèi.

Mo mei tla storia de Gherdëina ne n' à na grupa de bal populer pudù fé pea pra la giarida de juesc olimpics. La grupa de bal populer de Sëlva y S. Cristina arà chësc unëur y puderà, deberieda cun d' autri balarins dla valedes ladines, mustré n valgun bai pra la festa de giarida di juesc olimpics de Torino, ai prims de fauré dl 2006. Sambën se ncnunfurtons bele sën lessù....

Coche lia culturela se ons mpensà de ti jì do ala vedla usanza de jì a cianté la "Tlekanocht" y de judé nsci a la mantenì n vita acioche la ne vede nia perduda. Ti ultimi ani jiva mutons y mutans jëuni, furnii da bacans o da vedli, ora per la cëses a cianté la ciantia dl' avënt ne cunescian n gran pert nia l senificat de chësta usanza y fajan dainora na bona man o na garejeda de chi che tira ite plu scioldi. Chësc ne n' à nèt nia da n fé cun la "Glöcklnocht" tradiziunela y diventova for plu y plu n business.

Coche l ie da liejer te n Calënder de Gherdëina de dan n valgun ani ova bele ti ani '70 na grupa te Sëlva purv à a tré su chësta usanza che manaciova bele n iede de jì perduda.

Ma co ie pa la grupa do la vedla tradizion de Sëlva perdrët metuda adum?



I balarins y la balarines dla grupa de Sëlva y S. Cristina.

L paura y la paura che ie furnii su da snait y marciadea gën cun l patron de cësa. *L fedom y la fedoma*, plutosc melciafiei, uel ènghe vënder zeche y pieta mëscules o scarpëc. *L ost y la osta*, furnii drët da catif, sta plutosc dovia y rejonà mé sce i patrons ie osc. *L seniëur y la seniëura*, che reprejentea i prim seniëures che ruvova tla val y ie curiëusc de udëi chësc tlap de mascarei. *I paiazi* ie chëi che porta vivanda y alegria, fajan culëtes y sauc. Oradechël ài strumënc per acumpaniè chëi che cianta.

Ntan l ultimo tòch dla ciantia fej l paiazo na culëta da malan ite per stua. L paura va dai patrons a marciadé, l fedom se mescëida danterite. Do n bal se n péien via y

da port' ora balan y sunan, inant tla proscima cësa. Per rejons tecniches y de urganisazion ne saràl nia mesun fé do avisa coche l univa fat ti prim ani do la viera. Purempò purverons a mantenì chësta bela tradizion dl avënt tan plu avisa che l nes ie mesun.

Jiron a cianté chësta "Tlekanocht" tradiziunela cun duta si figures uriginales la juebies ai 8 y ai 22 de dezëmber te Sëlva y ai 15 de dezëmber a S. Cristina.

La Grupa da Bal Sëlva/S. Cristina uel nsci cuntribù al mantenimënt de chësta bela tradizion y se ncnunforta bele sën a unì a cianté la "Tlekanocht" te vosta cëses.

L presidënt dla Grupa da Bal

